



REPUBLIKA E KOSOVËS
REPUBLIKA KOSOVA | REPUBLIC OF KOSOVO
AGJENCIA PËR PARANDALIMIN E KORRUPSIONIT
AGENCIJA ZA SPRJEČAVANJE KORUPCIJE
THE AGENCY FOR PREVENTION OF CORRUPTION



Në mbështetje të nenit 9 paragrafi 1, nenit 5 paragrafi 1, nën-paragrafi 1.1., pika 1.1.1., nenit 12 paragrafi 1, nën-paragrafi 1.1., nenit 22, paragrafi 3 të Ligjit nr. 08/L-017 për Agjencinë për Parandalimin e Korrupsionit, si dhe Rregulloren Nr. 03/2023, për Procedurat e Hetimeve Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 29.05.2024, nxjerrë këtë:

Dep.	DPKI	Nr. Prot.	761/24
Dep.		Br. Prot.	
Dep.		Prot. No.	
Nr. Sht.	03	Data	30-05-24
Br. Str.		Datum	
Nr. Page.		Date	
PRISHTINË			

V E N D I M

I. Mbyllet rasti APK-DPKI-06-2239/23, për zyrtarin e lartë z. Fazli Shala, Kryeshef Ekzekutiv i Spitalit të Përgjithshëm në Pejë, për shkak se nuk ka prova të mjaftueshme që argumentojnë dyshimin e arsyeshëm për konflikt interesi në ushtrimin e funksionit publik

II. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

Agjencia për Parandalimin e Korrupsionit, pas pranimi të një denoncimi për konflikt interesi, ka filluar procedurën e shqyrtimit të rastit të konfliktit të interesi, lidhur me pretendimin si në vijim; *“Fazli Shala, Kryeshef Ekzekutiv i Spitalit të Përgjithshëm në Pejë, ka nxjerrë Vendim me nr.26/1-2 për caktimin e A.SH, kushëriri i afërt i tij, U.D. Shefi i Shërbimit Teknik në Spitalin e Përgjithshëm në Pejë”.*

Agjencia në pajtim me dispozitat e Ligjit për Parandalimin e Konfliktit të Interesit, e ka njoftuar zyrtarin e lartë për fillimin e procedurës për shqyrtimin e gjendjes së konfliktit të interesit në ushtrimin e funksionit publik. Pas kësaj, zyrtari i lartë është njoftuar për pretendimin e ngritur për konflikt interesi. Zyrtari i lartë z. Shala, përmes shkresës zyrtare ka sqaruar si në vijim; *“sa i përket lidhjes familjare ju njoftoj se jetojmë në të njëjtin fshat dhe kemi të njëjtin mbiemër, por nuk kemi lidhje familjare të afërt”.*

Agjencia për Parandalimin e Korrupsionit, lidhur me rastin ka kërkuar dhe pranuar dokumentacionin relevant nga Spitali i Përgjithshëm në Pejë.

Pas shqyrtimit të dokumentacionit është konstatuar se me vendimin nr. 26/1-2, i nxjerrë nga z. Fazli Shala, Kryeshef Ekzekutiv i Spitalit të Përgjithshëm në Pejë, ka caktuar zyrtarin A.Sh, U.D. Shefi i Shërbimit Teknik në Spitalin e Përgjithshëm në Pejë.

Në lidhje me pretendimin e ngritur për afërsi familjare, Agjencia ka kërkuar informacione nga Agjencia për Regjistrimin civil.

Agjencia për Regjistrimin Civil, në shkresën zyrtare të dërguar në Agjenci ka konstatuar se nuk është gjetur afërsi familjare ndërmjet Fazli Shala dhe A.Sh, kjo bazuar në regjistrin e gjendjes civile.

Dispozita e nenit 6 [*Konflikti i interesit*] të Ligjit për Parandalimin e Konfliktit të Interesit përcakton se:

*“Konflikti i interesit lind nga një rrethanë në të cilën zyrtari ka **interes privat**, që ndikon, mund të ndikojë ose duket se ndikon në kryerjen me paanshmëri dhe objektivitet të detyrës së tij zyrtare.”*

Ndërsa, me dispozitën e nenit 17 [*Deklarimi rast për rast i interesave private të zyrtarit*], paragrafi 1 të Ligjit për Parandalimin e Konfliktit të Interesit është përcaktuar se:

*“Çdo zyrtar gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vetëdeklarimin paraprak, rast për rast, të ekzistencës së **interesit të tij privat ose të personave të afërm me të lidhur me vendimmarrjen në një çështje të caktuar**, që mund të bëhet shkak për lindjen e një konflikti të interesit dhe të tërhiqet nga kjo vendimmarrje”,*

... lidhur me nenin 3 [*Përkufizimet*] paragrafi 1, nënparagrafi 1.2 të Ligjit për Parandalimin e Konfliktit të Interesit, me të cilin është përkufizuar se:

*“**interesi privat i personit zyrtar** - nënkupton çfarëdo përparësie për personin zyrtar, familjen e tij, të afërmit, miqtë dhe personat apo organizatat me të cilat ai ka pasur apo ka marrëdhënie afariste”,*

...nënparagrafi 1.6, me të cilin është përkufizuar se:

*1.6. **Person i afërm me zyrtarin** – bashkëshorti ose personi që bashkëjeton, të afërmit në vijë të drejtë të gjakut pa kufizime, të afërmit në vijë të tërthortë deri në shkallën e katërt, adoptuesi, i adoptuari, i afërmi në gjini të krushqisë deri në shkallën e dytë si dhe çdo person fizik apo juridik i cili ka pasur ose ka një lidhje të përbashkët interesi privat pasuror ose jopasuror me zyrtarin. Për qëllime të këtij ligji, personi juridik konsiderohet si person i afërm, sipas dispozitave të Kodit Penal të Republikës së Kosovës.*

Agjencia për Parandalimin e Korrupsionit, lidhur me pretendimin e ngritur konstaton se nuk ekziston situatë e konfliktit të interesit, lidhur me vendimmarrjen për caktimin e A.Sh, U.D. Shef i Shërbimit Teknik në Spitalin e Përgjithshëm në Pejë, kjo për faktin se nuk është vërtetuar afërsia si person i afërt me zyrtarin e as interes privat të zyrtarit siç parashihet në Ligjin nr.06/L-011 për Parandalimin e Konfliktit të Interesit.


Agjencia vendosi si në pikën II të dispozitivit të këtij vendimi, duke u bazuar në nenin 22 [Procedura administrative e Agjencisë për rastet e konfliktit të interesit], paragrafi 12 të Ligjit për Parandalimin e Konfliktit të Interesit me të cilin është përcaktuar se: “Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen

publike në faqen zyrtare të internetit të Agjencisë.”, si dhe paragrafin 15 të këtij neni, me të cilin është përcaktuar se: “Vendimet e Agjencisë në lidhje me konfliktin e interesit janë përfundimtare në procedurë administrative.”

Nga sa u tha më lartë u vendos si në dispozitiv të këtij vendimi.

Vendimi iu dërgohet:

- Zyrtarit të lartë publik
- Drejtorit të DPKI- së
- Z./znj. (zyrtari përgjegjës)


Ylli Buleshkaj
Drejtore i Agjencisë për
Parandalimin e Korrupsionit

